

Vatan yagonadir,
Vatan bittadir!

www.tongyulduzi.uz

Tong Yulduzi

2013-yil 14-oktabr

N:41 (66946)

Gazeta 1929-yil 1-avgustdan chiqqan boshlagan

O'zbekiston Respublikasi bolalar va o'smirlar gazetasi

ISSN – 2010-6092

BARKAMOL AVLOD – YOSHLARGA QANOT

Darhaqiqat, har tomonlama yetuk avlodni kamolga yetkazish, yoshlarga o'z iqtidorlarini namoyon etishlari, mustaqil faoliyat olib borishlari uchun shart-sharoitlar yaratish, ularni kasbga yo'naltirish, qolaversa, darslardan bo'sh vaqtlarini mazmunli tashkil-lashtirish maqsadida faoliyat yuritayotgan «Barkamol avlod» markazlari yoshlarimizga zo'r qanot bo'lyapti, desak mubolag'a bo'lmaydi.

Ayni kunlarda iste'dodlarni kashf etuvchi ana shu maskanlarda «Ochiq eshiklar kuni» tadbirlari bo'lib o'tmoqda.

Gazetamizning 2-sahifasida Toshkent shahar «Barkamol avlod» bolalar markazida o'tkazilgan ana shunday tadbir haqida o'qiydiz.

Ushbu sonida:

DILDA KURTAK
YOZGAN SATRLAR

5-bet

LOFNI DO'NDIRGAN
CHO'PON

6-bet

CHEMPIONLAR
MASKANI

7-bet



JANNATDAN BIR CHINDIM JOY — ANDIJONIM

Andijon! Ona yurtim, ota makonim! Bugun ushbu viloyatning qay bir go'shasida bo'lmang, u yerdagi obodlikni ko'rib, bunyodkorlik ishlariga guvoh bo'lib, ko'zingiz quvmaydi.



Keng, yorug' va ravon ko'chalar, osmono'par binolar, ko'rkam mahallalar, saramjon-u sarishta xonadonlar...

Istiqlol yillarida viloyatimiz o'ziga xos va mos yangicha qiyofa kasb etdi. Har yili Mustaqillik bayramiga munosib sovg'a tariqasida yangi-yangi inshootlar, ko'cha va xiyobonlarning foydalanishga topshirilishi yaxshi an'anaga aylandi. Ana shu an'anaga sodiq qolgan holda bu yil ham «Milliy tiklanish» va «Istiqlol» deya nom olgan ko'chalar qurilib, foydalanishga topshirildi.

Andijonliklar yurtimizni yanada obod qilishga astoydil bel bog'laganlar. Bu so'lim go'shaga yo'lingiz tushsa, uning ko'rk-u jamoliga o'zingiz guvoh bo'lasiz.

Isfandiyor HUSANZODA

Barkamol o'g'il-qiz — yoshlar sarvari, Kasb-hunar, bilimda dur-u gavhari

Bolalar-e bolalar, bog'dagi gul-lolalar, yangilikdan xabaringiz bormi? Qanday yangilik, deysizmi? Yaqinda siz aziz o'quvchilar uchun mo'ljallangan yana bir yangi «Zukkolar davrasida» nomli ma'rifiy-intellektual jurnalning nishona soni bosmadan chiqdi.

YANGI NASHR: «ZUKKOLAR DAVRASIDA»

Istiqlol sharofati bilan bolalar va o'smirlar uchun chop etiladigan nashrlar soni yana bittaga ko'paydi.

24 sahifada, sifatli qog'ozda, rangli suratlar bilan bezatilgan jurnalning mazmun-mundariyasi nihoyatda boy va rang-barang. Sahifalarni varaqlar ekansiz, «Durdona», «Siz sevgan adib», «O'zbek bolalar adabiyoti», «Javondagi javohir», «Mulohaza», «Iftixor», «Quvnoq she'rlar», «Hikmatlar xazinasi», «Istiqlol chechaklari», «Aql charxi» kabi ruknlar ostida e'lon qilingan materiallar, sevimli adiblaringiz Xudoyberdi To'xtaboyev,

Anvar Obidjon, Abdurahmon Akbar bilan uchrashib, sermahsul ijodlaridan bahramand bo'lish o'quvchini o'ziga jalb qiladi... Shuningdek, ingliz tilini o'rganishga qiziquvchilar uchun «Tongda» deb nomlangan dars ishlanmasi, yangi so'zlar lug'ati, «Jahon bolalar adabiyoti» rukni ostida mashhur rus yozuvchisi Lev Tolstoyning «Danak» hikoyasi o'zbek, rus va ingliz tillarida chop etilgan.

Ming bor eshitgandan bir marta ko'rgan yaxshi, deydlar. Xullas, yangi jurnalni o'qisangiz, o'tgan vaqtingizga sira achinmaysiz.

BONU tayyorladi



BARKAMOL AVLOD - YOSHLARGA QANOT

Bilasizmi, bolajonlar, ushbu suratlardagi bejirim o'yinchog'-u munchoqli bezaklar siz singari o'quvchilar qo'li bilan yasalgan. Bunday chiroyli buyumlarni yasash sizning ham qo'lingizdan keladi, albatta. Faqat buning uchun bo'sh vaqtlaringizda birorta to'garakka qatnasangiz, bas. Qayerda shunday to'garaklar bor, deysizmi, unda eshiting:

Kuni kecha Toshkent shahar «Barkamol avlod» bolalar markazida poytaxt umumta'lim maktablari o'quvchilari uchun «Iqtidorli va iste'dodli barkamol avlod» shiori ostida «Ochiq eshiklar kuni» bo'lib o'tdi. Tadbirda markazda faoliyat yuritayotgan barcha to'garaklar taqdimoti o'tkazildi.

Markazda texnik ijodkorlik yo'nalishida avtomodel, aviamodel, avtomatika va elektronika yo'nalishida radiotexnika, elektronika va aloqa, robototexnika va elektron o'yinchoqlar, texnik vositalar va kompyuter texnologiyalari yo'nalishida kompyuter dizayni va grafikasi singari bir nechta yo'nalishda faoliyat yuritayotgan to'garaklarga 6 yoshdan 16 yoshgacha bo'lgan o'g'il-qizlar jalb qilingan.

Mustaqillik yillarida o'quvchilarning bo'sh vaqtlarini mazmunli o'tkazish maqsadida tashkil etilgan mazkur markaz ularning eng sevimli maskaniga aylandi.

Umumta'lim maktablari bilan uzviy hamkorlik qilayotgan markaz o'qituvchilari o'z malakalarini muntazam ravishda oshirib borishadi.

to'garagiga qatnaymiz, — deydi Mirzo Ulug'bek tumanidagi 18-maktab o'quvchisi Samira Nabiyeva hamda Yunusobod tumanidagi 51-maktabning 3-«A» sinf o'quvchisi Nozima Obidova.

— Biz markazning «Zamonaviy raqslar» Nigora Nabiyeva bizga turli xalqlar raqslarini o'rgatayptilar.

— Men Mirzo Ulug'bek tumanidagi 112-maktabning 7-«B»

o'rganayotgan ekan.

— Men markazning barcha to'garak xonalarini aylanib chiqdim, — deydi shu maktab o'quvchisi Ra'no Agzamova. — Menga ham liboslar dizayni va ularni modellashtirish to'garagi yoqdi hamda unga a'zo bo'ldim.

— Biz markazning «Yosh doirachi» to'garagiga qatnaymiz, — deydi «Zarb» guruhi o'quvchilaridan biri Abdurashid O'rmonov. — Men amerikancha «Jambei» zarbli cholg'u asbobini chalishni o'rganyapman.

Guruh a'zolaridan 240-maktabning 9-«V» sinf o'quvchisi Nuriddin Sunnatullayev, Hamza tumanidagi 204-maktabning 7-«G» sinf o'quvchisi Asomiddin Shamsiddinov, XTV tasarrufidagi filologiya fanlariga ixtisoslashtirilgan davlat umumta'lim maktabining 7-«F» sinf o'quvchisi Davronbek Hamidullayev ham turli xalqlarning zarbli cholg'u asboblari chalishni o'rganishmoqda.

Mana, bolajonlar, Toshkent shahar «Barkamol avlod» bolalar markazi qoshidagi to'garaklar faoliyati bilan tanishdingiz. Bu maskanda o'z iste'dodingizni kashf qilishingiz mumkin. Agar sizda ham bu to'garaklarga a'zo bo'lish istagi tug'ilgan bo'lsa, unda shoshiling. Markazning tajribali murabbiylari sizni ochiq chehra bilan kutib olib, bor mahorat-u tajribalarini ishga solib, sizlarga kasb-hunar o'rgatishga shay turishibdi.

Ozoda TURSUNBOYEVA.
Zuhra NISHONOVA olgan suratlar



sinfida o'qiyman, — deydi Laylo Jabborova. — Men liboslar dizayni va ularni modellashtirish to'garagiga a'zo bo'ldim.

Poytaxtimizdagi 17-ixtisoslashtirilgan maktabning 3-sinf o'quvchisi Madina Evodullayeva, mana



ULUG'DIR USTOZ DEGAN NOM



Chindan ham ustoz haqida qancha gapirsak, oz. Unga atab eng go'zal ash'orlar bitsak ham, oldidagi qarzimizni uzolmasak kerak. Hatto ulug' bobolarimiz ham ustozlarini hurmat qilib, ularga munosib shogird bo'lish uchun harakat qilganlar.

O'qituvchi va murabbiylar bayrami arafasida men ham ustozimni qutlash uchun maktabga oshiqdim. Sinfdoshlarimning savollariga batafsil, atroflicha javob berayotgan ustozimni ko'rib, yuragim hapriqib ketdi. Qo'ng'iroq chalingach, sinfxonaga kirib, barcha o'rganganlarim uchun ustozimga minnatdorchilik bildirdim va ularga bag'ishlab yozgan she'rinni o'qib berdim. Yuzlaridagi tabassumni ko'rib, qilgan ishimdan mamnun bo'ldim.

Sitora NAFASOVA,
Navoiy viloyati, Zarafshon shahridagi
12-umumta'lim maktabining
6-A sinf o'quvchisi

Bizga maktub yo'llabsiz...

Biz yoshlarning kasb-hunar sirlarini egallashimiz, bo'sh vaqtimizni mazmunli o'tkazishimiz uchun tumanimizdagi «Barkamol avlod» bolalar ijodiyot markazi tomonidan ko'plab ibratli ishlar amalga oshirilmoqda.



TABIATNI ASRAYLIK!

Yaqinda markazda o'quvchilar qalbida ona tabiatga mehr uyg'otish, ularga tabiat ne'matlaridan oqilona foydalanish lozimligini uqtirish maqsadida «Ozod yurtimiz tabiatini obod etaylik!» shiori ostida ko'rik-tanlov bo'lib o'tdi.

Tanlovda yosh rassomlar, qalamkashlar o'zlarining tabiat mavzusidagi ijod namunalari bilan qatnashdilar. Markaz qoshida tashkil etilgan «Munchoq» raqs guruhi qizlarining xiromlari kechaga yanada jo'shqinlik bag'ishladi.

Tadbir so'ngida hakamlar hay'ati «Eng yaxshi tabiat manzarasi», «Eng yaxshi she'r» nominatsiyalari bo'yicha g'olib o'quvchilarni esdalik sovg'alari hamda «Faxriy yorliq» bilan taqdirladilar.

Dilshoda MAMADALIYEVA,
Farg'ona viloyati, O'zbekiston
tumanidagi 10-umumta'lim
maktabi o'quvchisi



TABRIKNOMA

(Hikoya)

Ustozlar bayrami kuni Malika odatdagidan barvaqt uyg'ondi. Hovlisidagi gulzordan xushbo'y, iforli, qip-qizil atirgullarni saralab, ulardan chiroyli guldasta yasadi. So'ngra, atayin ustozga atab yasagan tabriknomasini olib, qadrdon maktabi tomon oshiqdi. Yo'lda dugonasi Nargizani uchratib qoldi.

– Salom, Malika, ustozga qanday sovg'a olding? – so'radi undan dugonasi.

– Men oyijonim olib bergan juda qimmat atirni sovg'a qilmoqchiman.

– Men esa o'z qo'lim bilan yozgan tabriknomamni hamda mana bu gullarni sovg'a qilaman, – dedi Malika quchog'idagi guldastaga ishora qilib.

Shunda Nargiza dugonasiga yalt etib qarab, hayratomuz ohangda dedi:

– Voy, ustozga hurmating atigi bir parcha qog'ozmi, gullaring ham oddiyku, bozordagi qimmatbaho gullar emas...

Malikaning ustidan bir chelak muzdek suv quyilgandek bo'ldi.

Dugonasining o'ylamay aytgan

so'zlaridan qattiq ranjisa-da, sinfga jilmayib kirib bordi.

Ana, ustoz ham sinfga har kungidan go'zal bo'lib kirib keldi. Barcha o'quvchilar uni birma-bir tabriklab, sovg'alarini topshirishdi. Shu payt Nargiza o'midan turib:

– Ustoz, kimning sovg'asi sizga ko'proq yoqdi? – deb so'radi.

Ustoz barcha sovg'alarga bir-bir qarab chiqdi-da:

– To'g'risini aytsam, menga mana bu tabriknoma juda ma'qul bo'ldi, chunki unda dunyodagi eng qimmatli, samimiy so'zlar yozilgan ekan, – dedi jilmayib...

Shunda Nargiza dugonasiga aytgan so'zlaridan uyalib, o'ziga tegishli xulosa chiqarib oldi: demak, inson uchun qimmatbaho sovg'alar emas, yurakdan chiqqan samimiy so'zlar qadrliroq ekan-da.

Umida AKROMOVA,
Toshkent viloyati, Chirchiq
shahridagi 26-maktabning
9-B sinf o'quvchisi

MAS'ULIYATNI OSHIRADI

Bizni kimdir chetdan kuzatayotganini sezishimiz bilan dargoh sergak tortib, o'zimizni nazorat qilishimiz tabiiy hol. Xo'sh, maktab o'quvchilari kuzatuv kameralari xonalarda tahsil olishsa, o'zlarini qanday tutisharkin?!

Namangan viloyati, Pop tumanida joylashgan 25-umumta'lim maktabi yangi o'quv yilida qaytadan rekonstruksiya qilini, qator qulayliklar yaratildi. Shunday ko'rkam bilim maskanida tahsil olayotgan o'quvchilarning maktab formasi ko'zni quvontirsa, ularga ta'lim-tarbiya berayotgan o'qituvchilarning bir xildagi liboslari estetik zavq ulashadi. Ko'rgazmali qurollar, kompyuter bilan jihozlangan, qalin gilamlar to'shalgan sinf xonalarda o'quvchilar o'zlarini uylaridagidek his qilishadi.

– 8 ta sinf xonalariga kameralar o'rnatilgan, – deydi maktab direktori Mo'tabar Jo'rayeva. – Ularning aynan 8-9-sinf xonalariga o'rnatishimizning asosiy sababi, yuqori sinf o'quvchilari orasida darsga kech qolish, darsdan ketib qolish holatlari uchrab turadi. Ularni nazorat qilish orqali o'quvchilarni siquvga olish emas, balki tartibga chaqirishni, dars vaqtida ilm olishdan boshqa mashg'ulotlarga chalg'imasliklari lozimligini uqtirishni maqsad qilganmiz. Kameralarning qulayligi shundaki, bir nechta sinflarni kuzatish orqali o'quvchilar davomati, o'quvchi va o'qituvchining darsga munosabatini tahlil qilish mumkin.

Mazkur maktab o'quvchilarining sport sohasida erishayotgan yutuqlari ham talaygina. Yaqinda sportning qo'l to'pi turi bo'yicha viloyatda o'tkazilgan musobaqada maktab jamoasi 2-o'rinni egalladi.

Maktab davrida olingan puxta bilim kelajak uchun poydevor bo'ladi. Berilgan bilimni vaqtda egallash, uni yanada charxlab borish, poydevor mustahkamligini ta'minlaydi. Bu hayot haqiqatini teran anglagan mazkur ta'lim maskani o'quvchilari fursatni g'animat bilib, puxta bilim olishyapti.

Osiyo JAYLOBOVA

TAHRIRIYATDAN: Aziz o'quvchilar, qadrlil ustozlar, ota-onalar, faol muxbirimiz Osiyo Jaylobova o'z maqolasida qalamga olgan mavzu nafaqat biz, balki ko'pchiligingiz uchun ham yangilik bo'lsa kerak.

Xo'sh, bu xususda sizning fikringiz qanday?

Bu usul ta'lim-tarbiya samaradorligini oshiradimi?

Siz ham o'z ta'lim maskaningizda bunday tartibni joriy qilgan bo'larmidingiz?

Fikr va mulohazalaringizni kutib qolamiz.



VATAN HAQIDA SO'Z

O'XSHATAMAN MUNIS ONAMGA

Tahririyatimizga kirib kelgan muxlisimiz o'zini Munajat Usmonova deb tanishtirdi. U Jizzax viloyati, Forish tumanidagi Haydar ota qishlog'ida joylashgan 37-umumta'lim maktabi o'quvchisi ekan.



Munajat «Tong yulduzi»ning har bir sonini maroq bilan o'qib borishini, ayniqsa, unga «Vatan haqida so'z», «Ijod zavqi», «Bizga maktub yo'llabsiz» kabi ruknlar juda ma'qul bo'layotganini ta'kidladi. Uning samimiy fikrlaridan biz ham mamnun bo'ldik va Vatan haqidagi fikrlarini yozib oldik.

Seni o'xshataman munis onamga,
U doim mehr-la boqar ko'zimga, deya o'zi yozgan she'rini ifodali o'qiy boshladi Munajat.

Men Vatan deganda, kindik qonim to'kilgan zaminni, ilk bor ko'z ochib ko'rgan go'shani, oyog'im ostidagi zar tuproqni, musaffo osmonni, betakror tabiatni tushunaman va bularning barchasini muqaddas deb bilaman. Otamdek, onamdek e'zozlayman, ardoqlayman.

Orzularim juda mo'l. Ularning ijobati uchun bor bilimim, kuch-g'ayratimni ishga solaman. Qay biri amalga oshadi, buni vaqt ko'rsatadi. Ammo shuni ishonch bilan ayta olamanki, men kelgusida Vatanim, ota-onam koriga yaraydigan, ularni qadrlaydigan inson bo'laman.

Tengdoshingiz Munajatning fikrlarini diqqat bilan tinglar ekanman, uning qat'iyatligiga havas qildim va xayolimdan «Ishonch – eng katta yutuq», degan o'y kechdi.

Feruza SOYIBJON qizi

«Yurt ozod, turmush obod» insholar tanloviga «Obod» va «Ozod». Yurtboshimiz ta'kidlaganlaridek, bu so'zlar xuddi egizakdek. Men tug'ilib, kamol to'poyotgan O'zbekiston aynan shunday diyor! Zero, ozod yurtdagina turmush obod bo'ladi.

KOMIL FARZANDLAR – YURTGA YARASHAR



SAODAT olgan surat

Men yaxshi o'qishni, jamoat ishlarida faol bo'lib, turli tanlovlarda qatnashib, yuqori o'rinlarni egallashni asosiy vazifam deb bilaman.

«Tong yulduzi» gazetasida e'lon qilingan «Onajonim tabiat» insholar va rasmlar tanlovida 1-o'rinni egalladim. «Mustaqillik madhi bolalar ijodida – 2013» tanlovida «Faxriy yorliq» bilan taqdirlandim, shuningdek, «Yangi avlod – 2012» bolalar ijodiyoti festivalining Qoraqalpog'iston Respublikasi bosqichida 1-o'ringa sazovor bo'ldim, «Kelajak ovozi – 2013» tanlovida ishtirok etdim, Qoraqalpog'iston Respublikasi bolalar va o'smirlar nashri – «Jetkinshek» gazetasida chop etilgan uchun «2012-yilning eng faol muxbiri» nominatsiyasi g'olibi bo'ldim.

Shuningdek, yurtim farovonligiga,

jamiyatimiz ravnaqiga qanday hissa qo'shsam bo'ladi, deya ko'p o'ylanaman. Shunday o'ylar meni tuman «Kamolot» YOIH tashkilotiga yetakladi, men sardorlar Kengashi raisi etib tayinlandim.

Tengdoshlarim bilan birgalikda tumanimizda yashaydigan Ikkinchi jahon urushi qatnashchilari, faxriylar hamda yordamga muhtoj bolalar holidan xabar olyapmiz. Bilim maskanlarida esa «Sport bizning hayotimizda» nomli sport musobaqalari, «Qo'lni qo'lga beraylik, do'stlar!» shiori ostida rasmlar tanlovlari o'tkazyapmiz.

Yaqinda «Hasharga marhamat!» shiori ostida o'tkazilgan tadbirimizda bolalar yashayotgan ko'chalari, tahsil olayotgan maktablari atrofini tozalab, obod qilishdi.

«Obod turmush yili»da qilgan ibratli ishlarimizdan biroq ko'nglim to'lsa-da, hamon izlanishdaman.

Aziz tengdoshim, Siz-chi, mazkur yilda qanday ishlarni amalga oshirdingiz? Agar qilgan ishlaringizdan ko'nglingiz to'lmagan bo'lsa, unda harakat qiling. Shu yurtning munosib farzandi ekanligingizni isbotlashga intiling.

Sultonbek ZIYAYEV,
Qoraqalpog'iston Respublikasi,
Qonliko'l tumanidagi
7-umumta'lim maktabining
9-«A» sinf o'quvchisi

Iqtidorli tengdoshim

ISMIGA MONAND BO'LSIN

Qadrli o'quvchilar, gazetamizda «Iqtidorli tengdoshim» nomli yangi rukn tashkil qilingandan buyon tahririyatimizga sizlardan kelayotgan maktublar soni sezilarli darajada ortdi, desak ishonavering. Uni hatto ustozlaringiz ham katta qiziqish bilan kuzatib borishayotgani haqida yozishyapti.



«Bu ibratli rukningiz o'quvchilarimizni yangi-yangi yutuqlar, marralar sari ilhomlantiryapti. Undan munosib o'rin olish uchun puxta bilim olish bilan birga san'at, sport sohasida ham o'z iqtidorlarini namoyon etishga, hunar o'rganishga intilishyapti», deb yozibdi o'z maktubida poytaxtimizdagi 81-maktab o'qituvchisi Shoira Yusupova.

Qashqadaryo viloyatining Kitob tumanidagi 34-maktabning 6-«A» sinf o'quvchisi Saidbahodir Olimjonovning shu maktabning 5-«A» sinf o'quvchisi To'liqinjon Hafizov haqida yozib yuborgan iliq fikrlari bizni to'liqinlantirib yubordi.

– Iqtidorli tengdoshim To'liqinjonni negadir boychechakka o'xshataman, – deb yozibdi

u o'z maktubida. – Ilk bahorda qorlar orasidan yorib chiqib, quyoshga talpinadigan boychechakka. Uning «Yoz gashti» nomli ilk she'ri 3-sinfda o'qiyotganida «Bilim dunyosi» gazetasida chop etilgandi.

Bobosi – ko'plab she'rlarga muxammaslar bog'lagan, naziralar bitgan taniqli ijodkor Sa'dullo Asrorga havas qilib, she'riyat olamiga kirib kelayotgan yosh qalamkashning she'rlarida Vatan, ona, tinchlik, do'stlik, tabiat kabi mavzular tarannum etiladi. Ijod namunalari «Kitob tongi», «Bilim dunyosi», «Tong yulduzi» nomli

gazeta va jurnallarda tez-tez chop etiladi. «Nihol» nomli she'riy to'plami nashrdan chiqqan. «Yangi avlod – 2012» bolalar ijodiyoti festivalining tuman, viloyat bosqichlarida qatnashib, «Faxriy yorliq»lar bilan taqdirlangan. Maktab qoshidagi «Yosh adabiyotshunoslar», «Suxandonlik» to'garaklarining eng faol a'zolaridan biri bo'lgan To'liqinjon ingliz va rus tillarini mukammal o'rganishga astoydil bel bog'lagan. U a'lo o'qishi, namunali xulqi bilan maktabdoshlari, o'qituvchilari hurmatiga sazovor...

Kelajakda nazm va nasrda barakali ijod qilib, ezgulik yo'li bilan insonlar qalbiga yo'l topishni niyat qilgan To'liqinjon biz ham ijodiy parvozlar tilaymiz. Ismiga monand dengizdagi to'liqlar misoli to'liqlanib jo'shib yashasin, yurt ravnaqiga o'z hissasini qo'shib yashasin.

TABIAT

Saxiy ona tabiat,
Ko'rkam bog'-u dalasi.
Ko'rsatar bizga himmat,
Tuprog'in har zarrasi.

Jismimga orom berar,
Sof, musaffo havosi.
Dilginamga xush yoqar,
Qushlarning kuy, navosi.

Gul, chamanzor hammayoq,
Kundan kunga yashnaydi.
Atrofingga to'yib boq,
Qirda toychoq kishnaydi.

Suv tomchisi bebaho,
Ko'katlar dardga davo.
Seni qilamiz hurmat
Yashna, Ona tabiat!

To'liqinjon HAFIZOV

YULDUZZON



She'rni, ko'ngil ishi, deyishadi. Ko'ngil bortiqligining betakror ranglaridan orom olsa, she'r yozishga kirishamiz. Bahorda qiyyos o'chilgan gullardan bol yig'ib yurgan asalarilar yanglig' so'z izlashga tushgan bo'lsak, kuzga kelib daraxtlarning zarhal yaproqlariga tikilib, ich-ichimizdan to'kilgimiz keladi.

Ijod olamiga endi qadam qo'yib kelayotgan yoshlarimizning ijod namunalari o'qib, bolalikning beg'ubor olamiga qaytgandek bo'lamiz. Bortiqni bola nigohi bilan ko'rib, his qilish qanchalik zavqli ekanini bilgan sari ko'nglimiz yorishadi. Keling, yurtimizning turli go'shalaridan yog'ilib kelayotgan tengdoshlaringizning di'nomalari bilan tanishaylik:

Toshkent shahar, Chilonzor tumanidagi 182-maktabning 8-sinf o'quvchisi Abdulaziz ERGASHEV «Toshkent» nomli she'rda shunday yozadi:

*Sha'ningga she'r bitish
men uchun faxr,
Ta'rifingga sifat
axtargum dildan.
Bu zaminda yashash
eng go'zal taqdir,
Toshkentim, o'zingni
sevaman chindan.*

*Kechalaring kunduzdek charog'on,
Ko'rgan ko'z quvnaydi, porlaydi.
Ko'chalar sarishta, farovon,
Sayr etsang, yuraging yayraydi...*

Abdulaziz Toshkentimiz ta'rifini yorqin ranglarda shunday ifoda etganki, uning go'zalligi bo'y-basti bilan ko'z o'ngimizda namoyon bo'ladi, go'yo.

Xuddi shunday go'zal misralarni Chirchiq shahridagi 26-maktab o'quvchisi Dilnavoz NAJIMOVning «Omonning sayyorasi» nomli she'rda ham o'qish mumkin.

*Muallim savol berdi
Xayloparast Omonga:
– Bo'lsa uchar gilaming,
Ucharding qay tomonga?
– Osmonda do'stlik degan,
Sayyora kashf etardim.
Barcha yor-u do'stlarni
Unga olib ketardim...*

She'rni o'qib, beixtiyor Omonboyning ko'kda kashf etgan sayyorasiga chiqqimiz keladi.

Surxondaryo viloyati, Qumqo'rg'on tumani, «Yangiobod» mahallasidan maktub yo'llagan Sadoqat ERGASHEVA «Charaqlaydi tunda yulduzim» nomli she'rda:

*Termilaman osmon qa'riga,
Oymomaga tutaman yuzim.
Savol bisyor, sukut bariga,
Charaqlaydi tunda yulduzim.*

*Nigohimda asta chekinish,
Bekinmashoq o'ynaydi osmon.
To'xtang, to'xtang,
ketmang, yulduzlar,
Ketayapsiz ayting qay tomon?*



DILDA KURTAK YOZGAN SATRLAR

Sadoqatning tungi o'ylari o'quvchini ham yulduzlar harakatini, osmonning holatini kuzatishga undaydi. O'zbekiston davlat jahon tillari universiteti qoshidagi 2-akademik litseyining 3-bosqich o'quvchisi Yulduz MO'MINOVning «Tong otmoqda» she'rda:

*Bulutlarni oralab,
Quyosh quvnoq mo'ralab,
Yulduzlarni saralab,
Nurafshon tong otmoqda.*

*Gullar ham chiroy ochib,
Xushbo'y iforlar sochib,
Tunning qahridan qochib,
O'zgacha tong otmoqda...*

Yulduzxon har bir yangi tong kishiga o'zgacha kayfiyat bag'ishlashini go'zal tarzda ifoda etadi.

Qoraqalpog'iston Respublikasi, Taxiotosh shahri, Ishimboy ko'chasidan Dilafro'z AYTBAEVA «Bolalik» she'rda:

*Mendan kechding beg'ubor
xotiralarni tashlab,
Erkalading arazdan munchog
ko'zimni yoshlab,
Sen-la o'tdi kunlaring shodlik,
quvonchni boshlab,
Bir zumgina ortingga
qaytmaysanmi, bolalik?!*

*Yurakdagi orzular yulduzlardan
ko'p edi,
Ezgu niyat ijobat, armon
sira yo'q edi,
Ota-ona mehridan bebosh
ko'nglim to'q edi,
Orzularing ro'yobin
ko'rmay-sanmu, bolalik?!*

Ko'nglini bolalikdan uzolmayotgan qalamkash qizimizning iltijolari bizni ham quvnoq bolalik olami sari yetaklaydi.

Toshkent shahar, Olmazor tumani, Sebzor mahallasidan Muslimabonu G'ANIYEVAning «Nur yog'ilarda» nomli she'rda:

*Yomg'ir yog'ar shivalab,
Ko'z yoshin to'kar kuzim.
Jismim ketar jimirlab,
Xazonlar yopar izim.*

*Shamol qo'shiq kuylaydi,
Yomg'ir tingan pallada.
Chaqmoq chaqib quvnaydi,
Nur porlaydi dalada...*

Muslimabonuning kuz manzaralarini qiyosiy topilmalar, badiiy to'qimalar orqali tasvirlay olgani e'tiborlidir. Bunday shirali, quvnoq misralarni Farg'ona viloyati, Beshariq tumanidagi 36-maktabning 9-sinf o'quvchisi Madinabonu TO'LAGA-NOVAning «Nafisaning bahosi», «Kaktus», Xorazm viloyati, Xiva

*Masalan, bir sahroga,
Borsangiz och qolasiz.
Shunda bug'doy yeysizmi
Yo'ltinni deysizmi?*

Hammaga yaxshi tanish bu xalq maqoli satrlarga chatib bayon qilingan ushbu ohori to'kilgan «she'r»dan kishi hayratlanmaydi... Shuningdek, farg'onalik Ma'sumaxon JALOLIDDI-NOVAning «Mening Vatanim», Sarvinoz MANSUROVAning «Halovatim – Vatan», A'loxon BEGMATOVAning «Singlim», «Obod turmush», «O'zbekiston – Vatanim mening», toshkentlik Ruxsora SHOKIRJONOVAning «Aziz maskan – Vatanim», jizzaxlik Odilbek IRISQULOVning «Qishlog'im», navoiylik Manzura ISMOILOVAning «Baxt bu ...», «Ona», samarqandlik Gulsara O'ROLOVAning «She'rlarim», «Mustaqillik», navoiylik Mahfuza PO'LATOVAning «Taqdirimam, baxtimsan, erkin va obod Vatan!», «Vatan mo'tabar», Zarina ASHUROVAning «Sharq taronalari», surxondaryolik Xudoqul RAHIMOVning «O'rgan ingliz tilini», farg'onalik Gullola RAHMONALIYEVAning «Bahorni unutmang», toshkentlik Laylo ZAYNIDDINOVAning «Olis yo'lga chiqqan ey uzun karvon» nomli «she'r»lari ham sayoz so'z-lardan iborat jo'n satrlardir.

Afsuski, xorazmlik Bonu OG'ABOYEVA,

samarqandlik Go'zalbonu ISLOMOVA, farg'onalik Jannatxon O'RMON-JONOVA, Mohinur ABDUSAT-TOROVA, sirdaryolik Husan ISMOILOV, jizzaxlik Shoir QOBILOVA, Laylo XUBBIMOVA, navoiylik Ro'zana MASHARIPOVA, Mohinabonu TESHAYEVA, qashqadaryolik Fayoza ABDURAHMONOVA, buxorolik Madina HAKIMOVA, toshkentlik O'g'iloy ISAJONOVA, Diyora O'RINBOYEVA, samarqandlik Lobar G'OZIYEVA ham hali «g'o'r», pishmagan so'zlar, fikrlar yig'indisini «she'r» deb tahririyatga yo'llashibdi.

Ulug' adibimiz Muso Toshmuhammad o'g'li Oybekning shunday ibratli pandi bor: «Fanda keng, tekis yo'lo'q, faqat chag'ir toshli yo'llardan tirmashib chiqqan kishigina uning nurafshon cho'qqilariga yeta oladi».

Biz ham yosh ijodkorlarimizga nurafshon cho'qqilarni zabt etishlarida kuch-quvvat tilaymiz.

AXTAMQULI



*Arpa, bug'doy osh ekan,
Oltin, kumush tosh ekan.
Oltin bilan bir joyga,
Borsangiz ne qilasiz?*



ONAMGA

Bilimlar berdingiz biz o'g'il-qizga,
Dilimda jo'sh urgan she'rlarim sizga,
Har nafas tayyorman xizmatigingizga,
Ko'zida muhabbat porlagan onam!
Meni ezgulikka chorlagan onam!

Ushbu kun sizgadir qalbdagi tilak,
Siz borsiz, bizlarga kular kelajak,
Onajon, bu kun ayyom muborak,
Mening iqbolimni ko'zlagan onam!
Ilm-u ma'rifatdan so'zlagan onam!

Ko'zimdagi shodlik, quvonchim bo'lib,
Dildosh mehrbonim, suyanchim bo'lib,
Har nafas dildagi ishonchim bo'lib,
Kulib, boshginamni silagan onam!
Faqat yaxshiliklar tilagan onam!

Umidxon KARIMOVA,
Toshkent shahar, Sergeli sanoat kasb-
hunar kolleji 1-bosqich o'quvchisi



YURAGIMDA SO'NMAIDIGAN QO'SHIQ, VATAN!

U eski so'z, ko'zlarimda qarog' desam,
Netay kundan kunga mehr qo'yaversam,
Yuragini tutgay hatto yig'layversam,
Onamdayin topinguvchi borim, Vatan,
Jonlar ichra sig'inganim, jonim, Vatan!

Tug'ilgandan Vatan so'zin tinglaganman,
Va ilk bora, Vatan, seni anglaganman,
To'rt fasling ham sochlarimga gul qadagan,
Ofiab sendan nur olarkan olov, Vatan,
Otaginam boshidagi qirov, Vatan!

Nurlar to'la kaftlaringga dunyo sig'ar,
Tonglaringda onajonim sigir sog'ar,
Peshonangda har tun samo yulduz tug'ar,
Qishlog'imda jivirlagan soyim, Vatan,
Sunbul sochin yoyib turgan oyim, Vatan!

Mening alvon yuzlarimda gul yonadi,
Vatan desam tog'-u toshlar bo'ylanadi,
Beshigida necha alplar uyg'onadi,
Ne daholar ulg'aygan bu - beshik, Vatan,
Yuragimda so'nmaydigan qo'shiq, Vatan!

Sadoqat ERGASHEVA,
Surxondaryo viloyati, Qumqo'rg'on tumani

BUVIJON

Buvijonim, buviyon,
Ko'zingiz misli marjon.
Juda sevasiz bizni,
Nabira o'g'il-qizni.

O'rgatasiz oqlobni,
O'qi, deysiz, kitobni.
So'zingizda bor ma'no,
O'zingiz biram dono.

Xonadonlarga astun,
Siz bor, bag'rimiz butun.
Baxtimizga har qachon,
Omon bo'ling, buviyon!

BOLALAR

Quyosh nuri - bolalar,
Mehr qo'ri - bolalar.
Bizni sevar onalar,
Hatto amma, xolalar.

Bola ko'ngli beg'ubor,
Qo'nmasin unga g'ubor.
O'qib, o'rgansak agar,
Besh bo'lar qator-qator.

Mekkamtoş TOSHTMIROVA,
Qashqadaryo viloyati, Chiroqchi
tumanidagi Cho'lpon nomli
maktabning 6-sinf o'quvchisi

Qadim-qadim zamonda, el-u yurtlar omonda,
Qoraqalpog' tomonida bir xon hukm surgan ekan. O'sha
xonning oy desa oyday, kun desa kunday bir go'zal
qizi bor ekan. Qiz ulg'ayib bo'yiga yetganida, chor
tarafdan sovcilar yog'ila boshlabdi. Ammo xon
ularning barchasini noumid qaytaribdi.

Sovchilardan bezor bo'lgan xon bir kuni:

— Kimda kim yanglishmasdan yuzta lof gap
aytsa, qizimni o'shanga beraman. Bordi-yu,
aytolmasa, boshini tanasidan judo qilaman, —
deya jar soldiribdi.

Chor tarafdan talay-talay xonlarning,
vazirlarning, beklarning, boy-u badavlatlarning
bolalari kelib, yuzta yolg'onni qovushtirmay
boshlari tanalaridan judo bo'libdi.

Shu atrofda bir oddiy cho'pon yigit bor ekan.

Xonning shartini eshitib, u ham kelibdi:

— Xon hazratlari, men ham o'z
baxtimni bir sinab ko'ray, deb keldim, —
debdi u.

Shunda xon cho'ponga istehzo bilan
kulib qarabdi-da:

— Mayli, aytaqol, — debdi.


Cho'pon tutilmasdan gapira ketibdi:

— Hali tul onamdan tug'ilmay turib, bobomning yilqisini boqdim.

Shunda otam menga urg'ochi ola toyning qulog'iga en' solib berdi.

Oradan yillar o'tdi, toyim kattakon ola biya bo'ldi. Kunlardan bir kuni
biyam qorni ulkayib, yelinib yurganida, birdan yo'qolib qoldi. U yoqqa yugurdim, bu
yoqqa yugurdim, hech qayerdan topolmadim. So'ngra, astoydil qidirishga bel bog'lab,
bir katta tepalikning ustiga chiqib, chor atrofga razm soldim. Yo'q! Otimning ustiga
qurug'imni sanchib qaradim. Yo'q! Qamchimning dastasiga pichog'imni sanchib,
ustiga chiqib qaragan edim, osmondagi bulutlar ko'z oldimni to'sib qo'ydi. Men darhol
qo'limdagi qurug'im bilan bulutlarni u yoq-bu yoqqa surib, ko'zlarimni yumib turib
qarasam, kun bo'yi bo'zlab topolmay yurgan biyam olti daryoning naryog'ida, besh
daryoning bu yog'ida Oyga qarab qulunlab, Quyoshga qarab o'tlab turgan ekan.
Jonivor qulun biyaning bir u yoniga, bir bu yoniga sakrab iring'ishlaydi, deng. Darhol
qinimni qayiq, pichog'imni eshkak qilib daryoga tushgan edim, «shalop» etib cho'kdim-
u, ketdim. So'ng, qaytadan pichog'imni qayiq, qinimni eshkak qildim-u, daryoning bu
yog'iga zuv etib o'tib oldim.

Qulun jonivorni oldimga o'ngarib, biyaga minib daryoga tushgan edim, tag'in
cho'kib ketsam bo'ladi... Keyin qirg'oqqa qaytib chiqib, biyamni oldimga



LOFNI DO'NDIRGAN CHO'PON

(Qoraqalpog' xalq ertagi)

o'ngarib, quluninga mingan edim, jonivor, ko'z ochib
yumgunimcha daryoning bu yog'iga olib o'tib qo'ydi.

Shunda xon cho'ponning gaplariga shubha qilib:

— Tag'in daryo deyayotganing ko'lmak suv
bo'lmasin, — debdi.

— Ko'lmakmi yo boshqa suvmi, bilmadim-u,
ammo uning bu qirg'og'idan ertalab uchgan qush
u qirg'og'iga kechqurun qanotlari tolib, zo'rg'a
yetib boradi.

— Aytayotganing qush emas, endi qanot
chiqarib kelayotgan palapon bo'lmasin, —
debdi xon.

— Xon hazratlari, qanaqa qilib palapon
bo'lsin u? Qo'nalg'a-qoziqqa qo'ndirganimda,
boshidagi to'mag'a'si to'qqiz qanotli
o'tovning changarog'idan tepaga chiqib turibdi.

— U aytayotganing to'qqiz qanotli o'tov
emas, shunchaki bolalarning o'yinchog'i
bo'lsa kerak, — deya e'tiroz bildiribdi xon.

— Yo'g'e, o'yinchog' emas, xon
hazratlari, — debdi cho'pon xonni
ishontirishga harakat qilib, — bo'sag'asida turib

eshak hangrasa, to'rda o'tirganlar zo'rg'a eshitadi.

— U eshak emas, xo'tik bo'lsa kerak-ov.

— Iye, qanaqa qilib xo'tik bo'lsin, taqdir, — debdi cho'pon
kulib, — tunov kuni qor yoqqanda, o'sha eshakka oltimish kishi
mingashib quyon ovlaganmiz.

— E-e, eshak-peshaging bilan qo'shmozor bo'l, — debdi xon jahl qilib. — Boyagi
biyangni oldingga o'ngarib, quluning bilan qayoqqa bording? O'shandan gapir.

— Ha, aytganday, quluninga minib, biyamni oldimga o'ngarib daryodan o'tib
kelayotсам, oldimdan bir quyon chiqib qolsa bo'ladi? Darrov yoqamda sanchig'li
turgan ninamni oldim-u, o'sha ninam bilan qulochkashlab bir urgan edim, umbaloq
oshib tushdi. Endi buni pishirib, bir mazza qilib yey desam, uni pishirishga o'tin yo'q.

Muborak FOZILOVA tarjimai
(Davomi bor)

¹en — belgi qo'yish

²qurug'im — ot tutadigan, uzun tayoq uchiga bog'langan tuzoq

³to'mag'a — qarchig'ay bilan burgut boshiga kiydirilgan charm g'ilof

⁴changarog' — o'tovning tayoqlarini birlashtirib turadigan tepa qismi

TAEKVANDOCHILARIMIZNING ULKAN G'ALABASI

Bugungi kunda mamlakatimizda yoshlarning bo'sh vaqtlarini mazmunli o'tkazish uchun barcha shart-sharoitlar yaratib berilmoqda.

Buning samarasi o'laroq, birgina sport sohasida iqtidorli yosh sportchilarimiz ulkan yutuqlarni qo'lga kiritib kelmoqda. Ular dunyoning turli mamlakatlarida o'tkazilayotgan nufuzli xalqaro sport musobaqalarida yuksak natijalarga erishib, yurtimiz sharafiga munosib himoya qilishayotir.

Jumladan, 5-6-oktabr kunlari AQSHning Nyu-York shahrida

1997-2006-yillarda tug'ilgan sportchilar o'rtasida taekvandoning ITF yo'nalishi bo'yicha IX «Big Apple» xalqaro turnirida ham yosh sportchilarimiz yuqori natijalarni qo'lga kiritib, mahorat bobida dunyodagi tengdoshlaridan sira ham qolishmasliklarini namoyon etishdi. Dunyoning o'nga yaqin davlatidan



400 ga yaqin sportchilar ishtirok etgan musobaqada 8 nafar yosh taekvandochi bilan ishtirok etgan terma jamoamiz a'zolari 7 ta oltin, 5 ta kumush va 2 ta bronza medalni qo'lga kiritdi.

Nufuzli musobaqada Kamronbek Tohirov va Ibrohim Zohidov yakkama-yakka bellashuv va kompleks mashq yo'nalishlarida ikkitadan oltin medalga egalik qilgan bo'lsa, Hasan Inomjonov, Muhammad Ahmedjonov va Zarguna Ahrorqulova bittadan oltin va kumush medallarni jamoamiz hisobiga qo'shib qo'yishdi. Abdulaziz A'zamov esa bitta

kumush va bronza medal bilan taqdirlandi. Yakkama-yakka bellashuvlarda Suhrobbek Nafullayev ikkinchi, Amirjon Abduraimov uchinchi o'rinda munosib ko'rildi.

Musobaqa yakunlariga ko'ra, 14 ta medalni qo'lga kiritgan O'zbekiston termasi umumjamoa hisobida birinchi o'rinni egalladi. Ikkinchi va uchinchi o'rin AQSH va Puerto-Riko mamlakatlari sportchilariga nasib etdi.

Shahobiddin ORTIQOV

SPORT CHEGARA BILMAYDI

O'zbekiston Milliy parolimpiya assotsiatsiyasi, O'zbekiston Respublikasi Madaniyat va sport ishlari vazirligi va Ijtimoiy tashabbuslarni qo'llab-quvvatlash fondi tomonidan parolimpiya harakatini rivojlantirish, Parolimpiya o'yinlari dasturiga kiritilgan jamoaviy sport turlarini yanada ommalashtirish maqsadida futbol bo'yicha tashkil etilgan musobaqada maxsus internat tarbiyalanuvchilaridan iborat jamoalar ishtirok etdi.

Bugungi kunda yurtimiz parolimpiyachilari jahon va qit'a chempionatlarida, Paraosiyo va Parolimpiya o'yinlarida muvaffaqiyatli ishtirok etib kelmoqda. «5x5» – ko'zi ojizlar futboli ham Parolimpiya o'yinlari dasturiga kiritilgan. Sportning ushbu turi bo'yicha yurtimizda chempionat va musobaqalar muntazam tashkil etilmoqda.

Poytaxtimizdagi 43-bolalar va o'smirlar sport maktabida tashkil etilgan musobaqa iqtidorli yoshlarni saralash va terma jamoani shakllantirishga xizmat qiladi. Unda Andijon maxsus internat jamoasi birinchi o'rinni egallagan bo'lsa, ikkinchi va uchinchi o'rinlar Toshkent shahridagi maxsus internatning ikki jamoasiga nasib etdi.

Ayni paytda Navoiy viloyatida 6-18 yoshdagi 163 ming nafarga yaqin bola sport bilan muntazam shug'ullanmoqda.

JISMONIY MADANIYAT VA SALOMATLIK

Viloyatda zamonaviy sport inshootlari bunyod etish mavjudlarini qayta ta'mirlash va zarur sport anjomlari bilan ta'minlashga alohida e'tibor qaratilyapti. Istiqloq yillarida viloyatda 76 ta sport majmuasi qurildi, mavjudlari qayta ta'mirlandi. Ayniqsa, ta'lim muassasalari va qishloq joylarda barpo etilayotgan sport majmualari faoliyatidan aholi mamnun.

Sportni ommalashtirishning yosh avlod salomatligiga ta'siri, oilada jismoniy madaniyatni yuksaltirishning ahamiyati xususida olib borilayotgan targ'ibot ishlari o'z samarasini bermoqda. O'tkazilayotgan salomatlik haftaliklarida mutaxassislar tomonidan berilayotgan tavsiyalar bemor va kamquvvat bolalar salomatligini tiklashda qo'l kelmoqda.

Mutaxassislarning ta'kidlashicha, qaysi oilada jismoniy madaniyat yaxshi shakllangan bo'lsa, o'sha oilada farzand ham sportga ishtiyoqmand, fikrlash doirasi keng, sog'lom va irodasi mustahkam bo'lib ulg'ayadi.

So'nggi 3-4 yillik o'rganishlar natijasida suv sporti bilan shug'ullanuvchi bolalarda tana-muscul og'irligi ortishi va ko'krak qafasi aylanasi kengayishi kuzatildi. Sportning qaysi turi bilan shug'ullanishdan qat'iy nazar, inson organizmida qon aylanishi yaxshilanib, miyaning kislorod bilan ta'minlanish darajasi barqaror bo'ladi. Bu, o'z navbatida, miya faolligini oshirib, ma'lumotlarni tez o'zlashtirish va ilg'ab olish imkonini beradi. Qomat tik bo'lib, umurtqa pog'onasi nuqsonsiz rivojlanadi.

Shoh MUHAMMAD

Poytaxtimizdagi 283-umumta'lim maktabida ta'lim-tarbiya olayotgan 1130 nafar o'quvchining aksariyati bo'sh vaqtlarida sportning ko'plab turlari bilan shug'ullanib kelmoqdalar.

Bu maskandagi 300 ga yaqin o'quvchilarni jalb etgan futbol, voleybol, basketbol, qo'l to'pi, kikkoksing, yunon-rum kurashi kabi sport to'garaklarining faoliyatidan nafaqat bolajonlar, balki ularning ota-onalari ham mamnun bo'lishaypti. Tajribali murabbiylar o'quvchi-yoshlarga sportning sir-asrorlaridan saboq berishmoqda.

Maktabda turli musobaqalarda qatnashib, murabbiylari ishonchini munosib oqlab kelayotgan iste'dodli yoshlar ko'plab topiladi.

– Yurtimizda bolalar sportiga ko'rsatilayotgan alohida e'tiborning samarasi o'laroq o'quvchilarimizning bir qanchasi respublika va xalqaro turnirlarda g'olib va sovrindor bo'lib kelishayotganini ta'kidlab o'tish joiz. Har kuni ikki soatdan mashg'ulot olib boriladigan yunon-rum kurashi to'garagida umidli sportchilarimiz talaygina. G'iyos Muhammadjonov 2012-yil shahar ochiq birinchiligi va shahar kubogida birinchi, mazkur yilda Samarqandda tashkil etilgan respublika ochiq birinchiligi 35 kg. vazn toifasida shohsupaning eng yuqori pog'onasidan joy egalladi. Zohid Ahadov tuman, uning do'sti Hojiakbar Husniddinov shahar birinchiligi oltin medal, 2012-yil Samarqand shahridagi xalqaro turnirda kumush medal sohibi bo'ldi. Quvonchbek Lutfullayev kikkoksing bo'yicha shahar birinchiligi kumush, Shuhrat Eshturdiyev turon yakkakurashi bo'yicha 2012-yil Xorazmda bo'lib o'tgan respublika chempionatida bronza, 2013-yil shahar chempionatida oltin medal sohibiga aylandi, – deydi maktab rahbari

CHEMPIONLAR MASKANI

Nodira Qambarova faxr va iftixor bilan.

Bunday yuqori natijalarga erishishda bir necha yillardan buyon mazkur dargohda faoliyat ko'rsatayotgan tajribali murabbiylar – Furqat Mardiyev va O'ktam Pimazarovning xizmatlari tahsinga loyiq. F. Mardiyev boshchilik qilayotgan yunon-rum kurashi to'garagida 20 ga yaqin, O'. Pimazarov boshchiligidagi kikkoksing to'garagida esa 10 dan ziyod o'quvchi-yoshlar darsdan bo'sh vaqtlarini mazmunli o'tkazmoqdalar.

– O'quvchilik yillarimizda biror-bir sport to'garagini topish amri mahol edi. Boriyam shaharning bir chekkasida, zax joylarda bo'lardi. Hozir esa har bir maktab qoshida o'nlab to'garaklar faoliyatiga guvoh bo'lish mumkin, – deydi G'iyos Muhammadjonovning otasi G'ayrat aka. – Farzandlarimiz mana shunday imkoniyatlardan, yaratilgan shart-sharoitlardan oqilona foydalanishlari, ularning qadriga yetishlari, albatta, ularning hammasi o'z-o'zidan bo'lmaganini teran his etishlari lozim.

Yoshlarimizning puxta bilim olish bilan birgalikda bo'sh vaqtlarini sport bilan shug'ullanib, mazmunli o'tkazayotganliklarini, aqlan yetuk, jismonan sog'lom va baquvvat bo'lib kamol topayotganini ko'rib, kelajakda jahon arenalarida chempion bo'lishlariga umid qilib qolamiz.

Umid OMONOV



O'XSHATMA ERTAK

Uzoq o'tgan zamonda,
Hech kim bilmas tomond,
Bog'i Eram bo'larkan,
Unda gullar kularkan.

Odamlarning singari,
Ularda ham ilgari,
Yaxshi-yomon bo'larkan,
Buni hamma bilarkan.

Bir gul bor ekan oppoq,
Ko'ngli ham yuzidek oq.
Doim kulib turarkan,
Baxt ulashib yurarkan.

Barchani teng ko'rarkan,
Hol-ahvolin so'rarkan.
Qo'lidan kelsa yordam,
Berarkan dushmanga ham.

Bir sariq gul bor ekan,
Ichi juda tor ekan.
Ko'rolmaskan oq gulni,
Payt poylab yurib uni.


Ko'zlarini yopibdi,
Mayda-mayda chopibdi.
Oq gul yomon yig'labdi,
Yurak bag'rin tig'labdi.

Bag'riga olib ulni,
Suv tanasiz bu gulni.
Barglarini teribdi,
Bor mehrini beribdi.

Endi suv quchog'ida,
Barglari ardog'ida.
Oq gul manguga qoldi,
Nilufar deb nom oldi.

Har tong bulbul kelib xonish qilarmish,
Hovuz atrofida qizlar kularmish.
Nilufarning oydek yuzini ko'rib,
Sariq gul hasaddan yonib, kuyarmish.

Dildora BOTIROVA,
poytaxtimizdagi 129-umumta'lim
maktabining 9-«V» sinf o'quvchisi



**RASMLAR
KO'RGAZMASI**

*Tasviriy san'atga oshufta dillar
borki, borliqqa o'zgacha nigoh bilan
boqib, atrofdagi voqea-hodisalarni
ziyraklik bilan idrok etadilar.
Tabiatning biz ilg'amagan
qirralarini ranglar boyligidan,
uyg'unligidan unumli
foydalangan holda o'z
asarlarida aks
ettirishga urinadilar.
Musavirlarning ijodiy
izlanishlari mahsuli bo'lmish
asarlari tomoshabinlarni fikrlashga,
mushohada yuritishga
undaydi. Tasviriy san'atning sirli olami o'ziga maftun etadi.*

Poytaxtimizdagi 258-maktabning
5-«V» sinf o'quvchisi Mohinur
Mirzayevaning akvarel, guash bo'yoqlari
yordamida yaratgan kompozitsiyalarini,
chizgan rasmlarini shunchaki tomosha qilib
bo'lmaydi. Ularda aks etgan tasvirlar,
jonozotlar-u tabiat manzaralari go'yoki
tirikdek, harakatlanayotgandek, nafas
olayotgandek, tilashayotgandek taassurot
qoldiradi va ularga uzoq termilib
qolganingizni sezmay ham qolasiz.

Xalqimizning «Bo'lar bola
boshidan...» degan dono hikmati
Mohinur singari yosh iqtidor egalariga
nisbatan aytilgan bo'lsa, ajab emas.
O'zidagi iste'dod uchqunlarini tasviriy
san'at to'garaklarida alangalatishga
intilayotgan qizimizning tahririyatga
yo'llagan ijodiy ishlarini «Rasmlar
ko'rgazmasi» orqali e'tiboringizga
havola qilyapmiz. Baho berish Sizdan,
aziz o'quvchilar.

8

NA'MATAKNING DO'LANAGA DEGANI

Qatra

Kunlarning birida Na'matak Do'lanaga:

– E, Do'lanajon, avvallari bog'larda, adirlarda
o'sar edik. Odamlardan qochib, toqqa keldik.
Baribir bo'lmadi, shu yerdan ham terib olib
ketishyapti, – debdi.

Unga Do'lana kulib:

– Na'matakjon, juda ajoyibsan-
a, toqqa quvvat olish, odamlarga
darmon bo'lish uchun
chiqqanmiz-da. Bizning
vazifamiz ham shu! Shaharda
o'sganimizda, bizni yovvoyi
o'tdek chopib tashlashardi.
Insonlarga kerakli bo'lib
yashashga nima yetsin?! – debdi.



Dilnavoz NAJIMOVA,
Toshkent viloyati, Chirchiq shahridagi 26-maktab o'quvchisi

TOPISHMOQLAR



*To'r bilan o'rab olar,
Pashshaga zanjir solar.*

Maftuna JAMSHID qizi tayyorladi

14-oktabr 2013

Bosh muharrir
Feruza JALILOVA

Gazeta O'zbekiston Matbuot
va axborot agentligida
0208-raqam bilan 2007-yil
2-fevralda ro'yxatdan o'tgan.

TAHRIR HAY'ATI:
Omonulla YUNUSOV,
Abdug'ani XOLBEKOV,
Bahodir G'ANIYEV,
Svetlana INOMOVA,
Murtazo SULTONOV,
Zoir ISAJONOV,
Sa'dullo TURSINOV
(Bosh muharrir o'rinbosari),
Feruza ADILOVA
(mas'ul kotib),
Zikrilla TESHABOYEV,
Sobitxon TURGUNOV

Navbatchi
muharrir
Sayyora
QODIROVA
Rassom
Feruz
MATYOQUBOV
Dizayner
Shaxobiddin
MAXMADIYEV
Musahhih
Nargiza
ABDULLAYEVA

Manzillimiz:
Toshkent shahri,
Navoiy ko'chasi, 30-uy.
Indeks: 100129.
Obuna indeksi: 198.
e-mail:
info@tongyulduzi.uz
www.tongyulduzi.uz

Tel: 244-63-08
Tel./faks:
(99871) 244-38-10

«O'zbekiston»
NMIUda chop etildi.
Tahririyatga kelgan barcha
qo'lyozmalar tahrir qilinadi,
mualliflarga qaytarilmaydi.
Haftaning dushanba kuni
chiqadi: Shakli A-3,
2 bosma taboq.
ISSN 2010-6092
Adadi – 46871
Buyurtma N: J 8268

Muassislar:

O'zbekiston Matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOT» yoshlar ijtimoiy harakati Markazi
Kengashi,
«SOG'LOM AVLOD UCHUN» hukumati
qarashli bo'lmagan xalqaro xayriya jam'armasi.